

四庫全書

集部

欽定四庫全書

文恭集卷八

宋 胡宿 撰

奏議

論征蠻

臣竊見前代征討蠻寇所以為難者以其保聚巢穴掠
害邊境興師深入則有山林之阻久屯則有瘴霧之毒
兵不得戰人多疫死此其所以為難也今者邕土蠻賊

盡率反黨遠棄窟穴頓于廣州堅城之下平地之上已六十餘日矣退則歸路至遠進則大軍已集以臣料之賊氣必沮或聞廣州雖有山林不至深險賊久留不去者此天亡之機也今涼風方至瘴氣已息賊處平壤官據堅城士卒相依弓弩得用天時肅殺宜行誅討江西等路雖苦水旱計其小熟及茲西成猶足以調撥贍軍助國討賊臣以此觀天時地利人事之形王師誅逆宜及秋冬不可逗留更無機會楊政謙默不伐深沈有算

兼其忠孝出于天性誠堪屬以南伐總茲師律陛下宜
申勅諸將稟其節制則軍衆有所統一號令得以施行
今因賊亡之機與天時之利參定滅賊之策勿貪一時
之功戒之以在和訓之以持重多方設巧燒其船艦使
賊不得下海賊若下海攻陷瓊管以為窟穴即介在海
外王師無由致討矣乘間竊發入寇腹心則嶺南諸州
被害無有已時更復遷延至春夏或誘合鹽賊或煽動
羣蠻則江西諸路疲轉漕之役失耕稼之業大軍有疫

死之懼懷思歸之心久則變生一切雖在發生之候必用誅伐之威夫逆天時虧地利失人和三者舉事之忌也臣愚狂妄輒謂方今之計宜先料賊之多少計兵之衆寡若賊有萬人王師須有三倍之勢料擇精卒習用長技品配其衆番休與戰彼寡我衆彼勞我逸利則督士苦戰不利則斂兵且止如此者三時待其衰困各懷去就乃可申購募之典赦脅從之罪則人思效順衆必離散然後合勢大舉以圖殄滅若失機會恐逆黨愈盛

而後患滋大昔者食藿之人猶憂疆場負薪之語或益廊廟狂夫之言聖人擇焉謹具奏聞伏候敕旨

乞留三御史劄子

臣竊以御史者天子耳目之官所以上廣聰明下防威福若有畏懦無狀緘默不言即是尸祿素餐負陛下之任使罪之可也若其不畏強禦糾發姦違可謂能言是其本職旌之可也近聞臺官彈奏事連宰相陛下不置詔獄按問止令開封府訊狀憑劉宗盟一面單辭黜三

人御史于朝政有損于人情未服昨日聞御史差敕留中未下外議皆謂必是聖心覺悟不黜臺官人情莫不喜悅剛猛御史自古難得今若逐去須別舉人所舉之人未必能勝此也近日謫見未息姦宄須防古人有言猛虎在深山藜藿為之不採猶言直臣在朝姦臣遠避也臣欲乞降旨留三御史在朝以警姦邪臣昨晚蒙宣召已曾面論此事欲乞聖慈更賜詳度

乞慎選省府推判官提點刑獄

臣聞漢制刺史奉詔條察州秩六百石至卑也委之察一部者意在秩卑無所顧惜敢刺舉耳某年初置刺史部十三州文武名臣欲盡委察今之轉運使大抵漢刺史之職也陟黜臧否興利除害莫不係之國初用官亦輕選才則重其間外計多著能名古人有言引一代之人理一代之務不借才于異代若謂方今乏人是誣一代之人也顧朝廷所選用何如耳若欲天下轉運使盡得其人莫若慎選省府推判官提點刑獄此三道者取

才之要比來夤緣用人忽略此職一概置親厚之吏或假借橫勢之家故外計之任有以資敍而入往年葉清臣在三司判官不才者奏罷數人當時物論是之今稍稍復用矣天聖景祐之間屢降大敕舉提點刑獄頗亦得人近年多沿差遣敕上帶入選舉之法格而不行又罕見顯拔循吏為之省府陛下惠綏元元勵精政治近荆川廣知州通判知縣並須選差所以重遐方而矜遠俗也況轉運使提點刑獄表率部吏宣明風化可不慎

擇哉宜得通民事綽有才望者居之若按舉稱職風績較然或增秩再留或移莅劇郡俾久其任以伸厥能諸積久累官秩高而才下素望不著者不可使居其任恐隨職事且非陛下求治之意

論除授宿衛帥臣

臣竊以殿前馬步軍等帥臣統陛下爪牙之兵為陛下心腹之佐宿衛官省拱扈宸極凡所進任固先出于聖意然後參訪大臣公議既同方可除授近來內外臣僚

多舉武臣管軍此非臣下輕可論薦漢宣帝時丞相黃霸薦侍中樂陵侯史高為太尉帝使尚書召霸曰樂陵侯高帷幄近臣朕之所自親君何越職而舉之尚書令丞相霸免冠謝罪數日乃決霸為丞相薦高為太尉以職事言之未為過舉猶見詰責如此豈非以太尉掌武之官耶陸賈有言將相和則權不分權不分則士豫附士豫附則國家安以此而言宿衛帥臣當選謹厚樸忠之人以總禁旅不宜輕用論薦以收私恩或任非其

才則開隙生事國之利器所宜慎重

論河北邊備事宜

臣聞地有常險而國無常地此古今得失之勢異也古者北有盧龍之塞白檀之險隔限南北中國得之控扼北敵今此二險敵反有之河北地形無險可守自河南北達于澶淵平壤二千里景德中一旦北騎至河上當是時去祖宗纔四十年兵強將勇習知戰鬪至煩章聖親駕敵始懼而乞和河北名將帥楊廷昭馬知節李允

則何成矩孫全有盛名扈駕則李繼隆石保吉內臣則秦翰皆數經戰陣自河決商胡失橫隴故道中國亡大河之險虜乘虛擣滄景則山東危願用張宗益郭申錫言割濱河德博以隸滄別為一路屯兵以扼敵衝備不虞國之福也伏望聖慈特詔大臣講究速行

論邊界守約束

臣聞憂患之來多藏于細微而生于人之所忽自邊臣趙滋舉行界河打魚刈葦一切禁斷由此漢兵多與北

鬪累年不絕和好之體一旦至此怨隙之開亦不在大
去年八月庚寅大雨水今春彗孛謫見上天不言以文
象示下陛下宜思內外憂患彌縫其缺蓋有備則患不
能深無釁則亂不能起界河武思趙用輩雖時立小忠
皆不達大計宜密行戒約臣觀景德詔安撫司皆防微
慎重自景德以後詔書數更北人打魚安于積習邊吏
弛職不復譏呵及至舉行舊條而淵魚見察衆狙皆怒
履霜已深堅冰且至願大臣早為之備國家承平百年

與敵通好者六十歲內外無患前所未有近年邊遽來上不過侵誣尺寸疆候此夷敵之常態縣寨之本職移文足以辦之何遽至興甲兵哉今搢紳中有恥燕薊外屬者若天時未與人事未至而欲妄意難成之福不如講和息民擇良將以守邊選能臣而修聘外固歡和之形內修守禦之備羈縻不絕守真宗仁宗法度以惠養元元則天下幸甚

論西夏事宜

臣聞漢武收河南地築朔方開置河西五郡中國得之以隔絕羌胡不得相通前世謂之斷匈奴右臂今盡為夏國所有夏國主諒祚恃犬羊之衆濟凶父之惡去年不顧誓詔燒劫秦鳳涇原兩路熟戶肆行殺掠滿意而去邊臣畏懦按兵不出朝廷降詔詰問拒使者不之納及賀正人至以壕外地屬戶為說此地慶歷中西蕃溪洞所獻檢據甚直詔答已詳近日延州安撫司復奏夏國乞遣使齎狀乘驛詣闕其意無他止是申尋前語圖

起爭端臣恐疆場之憂未息也如聞西人常有意闕秦
中同家堡一帶著部正扼西賊來路涇原若失此險無
所隔闔賊馬一二日可至古渭古渭可至則秦中搖矣
雖聞今年歲在東井為關中之福星家說鎮歲所在不
可加兵然五緯盈縮進退不常難可恃也彼若不畏天
道輒來犯順盈縮繫于天道成敗先于人謀若止是論
議理壕外地界朝廷必無開許彼見不許有必爭之舉
大集羣醜以撓諸務如聞西賊尚有窺伺邊隙結納熟

戶之意欲望聖慈明戒邊帥豫備不虞綏靖鎮撫明遣
間探講練軍政以佚待勞彼知我有備決不敢遽起事
端

論邊事

臣竊以景德二年遼人乞和章聖深維遠慮務息邊氓
俯屈至尊下柔獷俗繼以仁宗聖德順成先志彌縫間
隙得羈縻勿絕之義自爾邊境長無風塵之警父老不
識金革之事大德至恩在民深矣國家承平百年其間

通好居六十年前世所未有近日戎人移建舖居侵越
代州疆界吏止之奮兵與漢兵鬪又雄州奏契丹人騎
兩過拒馬橋南伐去柳栽千餘放箭射歸信縣尉又界
河舊制北人不得取魚雖素有禁防或聞私亦曾採捕
舊不聞有關爭之事近年禁禦太密鬪爭不絕亦曾射
傷巡檢殺死邏兵邊臣恬然曾不為怪朝廷奏報視為
閒事未審鬪爭不止其末如何皆積不相能馴致此釁
履霜之漸堅冰且至誠懼章聖和戎之策從此而壞國

家居常備陝西次及河東未嘗深留意于河朔陝西河東兩路兵官經朝廷選所得差多極邊城寨都監寨主之類則又許帥保薦頗得土人曉識山川險易習知蕃戎情態又有內屬蕃部為之障蔽土兵蕃落保捷之屬皆便弓善戰以一路兵力得良帥制之寇至可以戰可以守河東險固去年西賊燒劫涇原秦鳳熟戶蕃部迄今環慶賊馬鈔掠未已然今年歲在東井東井秦分為關中之福星家之說鎮歲所在不可加兵宜勅沿邊諸

將嚴兵為待賊若大舉犯順我得天道不宜縱敵兵法
所謂敵加于已不得已而應之者謂之應兵兵應者勝
彼自守窟穴無所侵軼不宜提兵深入自違天道前所
謂朝廷未嘗深留意于河朔者豈非恃盟好重改作防
虜人之疑乎方今之計莫若外固懽和之形內修守禦
之備且河朔地形無險可守自雄莫以南平壤千里往
時黃河流入邊境無慮五七里自河決商胡不由橫隴
故道河北水流散漫失中國大河之險不能限隔戎馬

盛冬冰合鐵騎可過北人若以精騎擣滄景之虛長驅南下則京東搖矣河北雖有塘水城壁利兵堅甲無所恃之臣非能知前後通邊事者言之多矣朝廷以北人無釁未暇經略今來邊釁已有萌芽防于幾先姦謀自破今陛下聖德日躋神機天挺燭知萬事之統坐照四夷之情廟堂之上俊乂大臣皆有文武全略通知三路利害者豈臣愚瞽標聞所能究知然而負薪之語有益廊廟況預聞政事稔知邊患敢默而去乎欲乞令中書

樞密院檢取前後臣僚上言章奏相度可否施行

辭免尚書禮部侍郎劄子

臣近蒙聖恩不次遷秩傳聞之始隕越于下尋具劄子懇叩乞行追寢而高邈之聽未照卑凡樸訥之辭不蒙開允今早亦嘗面奏親奉德音仍遣中人奉宣宸旨促令祇受押赴告謝以聖慈堅重天語丁寧不敢有違尋已授訖然而公議可畏私懷未安須至縷陳重煩聽覽伏惟仁宗皇帝以仁聖至德臨蒞天下四十載東宮虛

位大本未立知陛下有聖賢之量建為皇子付託大器
天人之望宅心有所四海之命始有攸屬一旦入繼聖
統中外晏如厥初大憂感慕聖體雖小有虧和而神靈
護持終獲勿藥之喜是祖宗基德之厚仁宗知聖之深
在于羣臣何力之有豈可貪天之功橫受寵命自省甚
熟衆議謂何況臣衰殘無所云補未能引退已負兢慚
儻竊崇恩更尸厚祿必招譏議恐致咎殃伏望睿慈深
亮愚悃追停渥命庶安危抱取進止

狀

舉臺官狀

准敕限十日內于外任太常博士以上曾歷一任通判成資以上或歷通判一年以上堪充三院御史保舉兩人聞奏如三丞內有合該磨勘者亦許保舉仍須自來別無贓濫忠厚淳直通世務明治體之人如朝廷選擢任用之後所舉人犯入己贓竝當同罪其餘贓私及不如舉狀亦當連坐者一員某處任官

用黃貼
子任所

一員某處

任官

同前

右謹具如前臣伏見上件官等竝是直諒多聞

堅正有守資于風識濟以文采堪充三院御史臣今保舉如朝廷遷擢任用之後犯入己贓并其餘贓私及不如舉狀竝依所授敕命指揮甘當同罪連坐謹具狀奏聞伏候敕旨

乞楊開充大理少卿狀

臣等伏見國子博士楊開材資敏通檢履端約深達時務尤長法律先曾刪修銓司敕條至今行用稱為允當

昨日知絳州服除赴闕審官三班院見各奏辟刪修本
司條貫觀其議法詳平正而有守臣等今保舉堪充權
大理少卿公事如經朝廷擢用後犯正入已贓及不如
舉狀竝甘同罪取進止

兼侍讀學士舉官自代狀

臣伏蒙聖慈除臣兼侍讀準敕合舉官自代者竊見尚
書戶部郎中直史館張瓌博通古今練達典故有國僑
博物胥臣多聞可以進讀羣書入奉大對臺閣久次朝

廷具知若以代臣允協公議

論增經術取士額狀

臣等竊以六經傳先王之道教化根本舊制試進士止以詩賦策論簡拔才俊其實少有專門名學之人諸科雖能誦記章句復又不通大義施于有政則又面牆所以前後論取士者常以此科為言景祐制書節文始令禮部貢院舉人通三經以上進士諸科過落外許自陳嘗于某處講授某經貢院別試經義十道直取聖賢意

義解釋對答或以詩書引證不須全具注疏以六通為合格講誦精通具名聞奏乞差學官或御試覆試得中具對義粗通取旨此則聖朝扶進經術漸復兩漢射策之舉也慶歷六年應詔者四十人合格者八人進士諸科各四人皇祐元年應詔者八十二人合格者七人進士五人諸科二人今年投牒進士七十七人諸科五十人凡一百二十七人比之嚮來數目倍多豈非詔書開勸使然而利祿誘導之至也條制每科不得過五人比

再經覆試又須通落獎進之路似未開廣恐學者稍怠
懈美業中止臣等欲望聖慈稍增人數以勸來者四方
聞朝廷參用此科取士莫不靡然向風潛心經術則彬
彬之舉兼成于前代矣臣等見精加攷試須至具狀奏
聞伏候敕旨

代中書密院傳法院罷堂奏狀

臣等伏蒙聖慈以傳法院譯乾元節新經罷堂就本院
特賜臣等御筵者千載挺生屬感符而毓聖五天駕說

慶繙貝以成書仰契真乘永延壽厯方繕寶函之目將
升緇几之觀梵教旁流增衍觀花之義宴慈申錫更均
在藻之仁臣等叨預鼎司竝游譯館祝後天之洪祉參
問佛之勝因彌愧空疎薦霑腴飫

奉使北朝先狀

備完使傳取道治封趨賓館以無階辱珍函而猥及瞻
言勤意但切感懷

夙馳星馭已講于慶儀復次樂都遽承于染翰即披光

範深恆鄙懷

叨備使華已通邦好載馳軺傳俯屆藩垣遽辱緘滕但
深銘鏤

將命宸庭修聘鄰壤征軺夙駕將次于會都賓館為容
即瞻于台座豫為歡忭曷罄言陳

參聯華隰修講鄰歡飾軺傳以載脂將臨于會府望門
牆而延脰即覘于台儀豫此欣愉實為榮幸

信書將命恭修邦聘之儀行傳戒塗適次都城之壤辱

榮函而俯及荷謙德以彌冲即詣賓階豫歡私悃

議

代中書詔定大樂名議

案宋史定大安樂名在皇祐三年禮臣王堯臣等上

其議

准今年二月二十三日敕准今月二十一日詔敕中書門下朕聞至樂之大統和天人奮雷先聞萬物蠢若聖人觀象于豫以崇薦配百代之興咸有制作眇觀載籍旁採緯牒詠功象德率著榮號若顯譽題根英之文陶

虞紀明紹之美三王殊憲稱謂炳焉降及後世鮮克遵
尚惟東漢命以大予開元自云唐樂雖距古未遠而雅
于言道希風咸夏朕所慕焉故前詔執事訪圖博採將
以立度出均攷音正律謹權審量備器協舞以定本朝
之述作用彰祖考之謨烈夫名生于義義出乎實名正
言順然後事成而禮樂興焉庶幾光輝永昇來裔其令
兩制及禮官參稽典制議定國朝大樂名中書門下審
加詳閱稱朕意焉故茲詔示想宜知悉臣等謹議曰臣

等賤情不足以明國朝大樂竊尋前志探觀往古受命而帝聖功告成守文之君治道大備濟斯民于富厚流至化于洽平鮮不攷合中聲序正雅樂效法功德章明祖宗宣之于鐘石管絃著之于干戚羽籥乃復揣稱治象形容德美度曲以颺其義立名以統其實崇薦郊廟允諧神人感召至和以降嘉生咸池而還作者代有韶夏大濩從來尚矣允屬熙盛詎宜曠闕伏惟太祖皇帝謨武而聖大度且仁變伐拯于橫流揖讓馭于歸運平

殄僭閭埽除荒屯天地號為重開區夏繫其再造一戎
底定萬世以基太宗皇帝以聖域優入之姿膺神器傳
歸之重協承駿烈紹敏武功越人奉圖以歸忠參墟銜
璧而服罪正朔所隔亦既來同文告是加無恩不服廣
英材之教育盛王官之辯論審克邦憲祖尚人文俗阜
刑清官修政舉太平之盛于斯經啟真宗皇帝體全上
睿道合至真昭前之光明而濟之以文采化下以清淨
而納之于忠厚謹任吏之法嚴取士之規為官擇人程

才濟物規安億姓撫和諸戎荒服遂要于衣裳老人不
識于金革符命紹至封禪勒成咸秩上下之神垂矜大
小之獄倉庫充實囹圄空虛炳焉聲明絕于稱謂伏惟
皇帝陛下欽明燭治仁厚好生躬至德而若虛求昌言
而如渴懷柔異俗休息邊氓繼好蹕林納附河外簫勺
羣慝弓矢載櫜屏弋獵之娛稀園游之幸升世室之配
侑同戚藩之榮樂刑書用其中典民賦從于薄斂積四
聖之致治逮百年之勝殘山川鬼神亦莫不寧蛟魚麋

卯皆有常禁海內蒙德薰蒸太和丁斯時也樂典未章
榮號不立此有司之失弗能究宣陛下開至明發深詔
敷求識微之士逮及承學之列求端中泰造始黃鍾攷
律和聲稽器定制五音六舞各得其準習隸樂府以章
三聖之功德莫盛焉臣等中被詔書參定明義謹按太
常天地宗廟四時祠祀樂章凡若干首以安名曲尋其
義也豈非本道德政教嘉靖之美亦沿神靈祖考安樂
之故名既素定義足欽承詩美率由舊章記稱孝莫善

于繼志書言惠莫大于安人臣等議上國朝之樂宜名曰大安乞宣付中書門下審加詳閱謹議

代中書密院覆議大樂名狀

功成而樂作治定而禮興百王之隆道雖同貫六代之盛樂皆殊名示沿革之匪常明制作之迥出移風俗而美教化薦上帝而配祖考以成功而告神明非甚盛德孰能預于此往者唐失根統倒持罇柄蕩無維御遂至陵遲日尋戈兵時悼塗炭九土分裂于下三光錯繆于

上鬼神失其常祀天地發于殺機甲子一周閏位五姓
天而既棄唐德且厭華亂故駿命集于我宋伏惟太祖
皇帝英武挺出歷數攸歸屬天道之與能膺神宗之內
禪懲艾僭暴顧嗟溺喪奮耀霆斷龔行電討芟除不義
勤恤有生經啟人倫靖一天宇兵賦悉還于公上權綱
不假于近習除吏歸于尺一立法約于三章尊本京師
維制方夏陶甄獨運禮樂自出全安諸國之後崇立百
神之祀象緯宣精人神享德規模宏遠基圖篤厚開濟

萬世卓無與倫太宗皇帝天人宅衷謳歌在聖嗣膺神
寶纘立武功薄伐晉人遂夷并壘提封畢入象譯具通
敦先儒雅之風周咨政道之要時文載郁俊民用章置
讞刑之官建藏書之策講求世務矜恤民隱賦斂蠲其
重法更徭著于輕科黎庶安生刑罰幾措真宗皇帝纘
戎二后神睿昭通率由民彝躬行儉約勤勞機政之總
慎重刑賞之施選舉廉能賓興俊茂右文宗術劭農恤
刑德讓興行吏治循厚深恤民之愛講和戎之利戈革

弗用疆陲底寧瑞命宣臻頌聲翕作始奉符而行事乃
昭姓而刻號諸神受記羣望咸秩炳焉之美同風三代
皇帝陛下體茲上聖迪惟前憲臨下崇于含垢在宥本
乎好生博愛無私甚德而度紹修戎好銷戢武彞事郊
廟以肅祇撫宗藩而敦睦肅若舊典祠于明堂升侑尊
先泛澤勞下積累聖之忠厚滲生民之骨髓物罔微而
不遂澤靡遐而弗臻上下相安表裏悅穆思欲播祖宗
之洪烈揚雅頌之正聲光施尊名章示後嗣同符韶武

常為稱首故深詔執事博延識微乃者造計秒忽攷聲
立均通鍾律之和正干羽之綴申命近列制名大樂俾
援典禮參加詳實臣等欽惟藝祖之戡暴亂也安天下
之未安其功大二宗之致太平也安天下之既安其德
盛陛下之承聖業也安祖宗之已安其仁厚又享祀時
至神靈嘉樂故郊廟樂章大率以安名曲臣等以謂國
朝大樂請如兩制及禮官所議名之曰大安

文恭集卷八

欽定四庫全書

文恭集卷九

宋 胡宿 撰

表

中書賀南郊祥瑞表

報本申虔奉符展窠天心顧享福應宣章瞻列象之殊
尤泱羣心而聳朴中賀伏惟皇帝陛下德兼魏煥運格清
寧敦慈寶以庇民握道樞而裁化念大事之在祀逸典

竝修本至誠以感神精心弗匱比者因天心之紀至就
陽位而卜郊惟洛禋之祕文乃霄晨之丕貺戒嚴法衛
茂對鴻靈爰自翼室齋居清場宿設躬致芬馨之薦允
迪純嘏之祥十輝昭融延和于北陸五雲絢藻垂蔭于
宸中旋整駕于殊庭用致恭于真祖圓靈載廓素魄徐
升聿昭三善之猷迴發重輪之彩諒皇穹之鑒佑著睿
感之敷聞胥契亨辰茲為至瑞臣等幸陪禋祀預覲嘉
徵慶躍之誠倍異倫品伏望宣付史館以播英聲

代中書樞密院賀司天臺奏壽星見表

臣某等言伏覩司天監奏丙位上占見壽星出見光明
潤澤謹按景祐乾象新書占曰老人一星在弧矢南一
名南極主帝王福壽者月旅陽中星昭丙次前告壽星
之兆迴含明潤之輝凡遇亨嘉同歡瑞福

中賀

伏惟皇帝

陛下廣淵成聖疊穆居尊恭已當陽順大中之五事撫
辰育物協通政之四時裁成七政之和嚮用九疇之福
先青祇之中候見南極之上躔彌紫宙以收氛臨黃衢

而泛彩老人垂象俾下土之觀文太史獻占慶後天之
膺壽有光聖日增煥祥編臣忝冒近司預聞嘉應奉億
年之瑞貺均萬宇之歡心永保無疆光昭不朽

代賀立后表

臣妾言恭以紹興大寶崇建長秋凡在幅員孰不欣抃
伏惟皇太后殿下慶鍾沙麓光協壽房蘊四德以薰徽
契千齡而偶聖玉衣之夢素協于奇祥金穴之華早膺
于妙選屬大橫之纘服奉禴翟以正名抑有典常允歸

謠頌永正軒龍之體長扶璇極之尊與乾同休配坤惟厚臣妾無任歡呼屏營之至

賀奉安三聖御容表

臣某言伏聞南京鴻慶宮成奉安三聖御容禮畢者繼敞新宮續成先志鼓鐘所落鳧藻相歡臣竊以別寢之興蓋尊王業原廟之設實廣孝思稽克構于聖功兼表崇于文教光昭宗祏慶洽天人伏惟皇帝陛下凝監太清紹休聖緒觀文闡化握河洛之坤珍受命宅中都房

心之星次惟藝祖肇基之地經先皇駐蹕之巡特創琳
宮阜安鼎邑殊庭中廢宸慮載凝濬發德音勃興寶構
森倚萬楹之威仰延三后之靈孝子求神固非一處先
王不寐迺懷二人奉漢寢之游冠尊軒臺之晬表龍舟
夙發羽葆親臨申命禁林之臣奉寧法物之駕神明氣
象胥接二京之間朝野頌聲共歡千載之際臣遠守郡
土久去國門方童觀之時阻窺朝美興壤謳之俗竝樂
時康

代僕射寇相讓恩第一表

絲綸誕告有命自天冰炭交懷跼身無地

中謝

竊以宰弼

之職政本是毗寅亮天工翊宣人紀上以應泰階之耀
下以副巖石之瞻當一人注意之求處百度仰承之地
是故明詢于衆昆命爾龜周建公懷不敢必備官之制
漢虛相府用以待遠方之賢蓋倚任之絕崇在授受而
斯允如臣者本惟常品素昧遠圖幸以遭遇先期忝塵
邇列偶繼協華之旦彌敦敘舊之私爰立巖廊對掌衡

軸邁戢干之在運獲覩承平慙借箸之無謀茂仲毗贊
內惟孤直終荷保全矧又總職樞庭聯榮鼎坐奉循成
憲欽率乃司齟齬無稱容容茲愧猶復授以元戎之旌
纛佩以丞相之印章節制十連董齊千乘離宮司鑰仍
膺冊畢之恩專閫剖符更委含岐之壤名數增盛眷顧
有加實儒素之極榮豈生平之所望自知甚熟享大為
憂惟恪守于攸箴亦絕聞于報政宴安厚味荏苒流暉
企員闕之百常居懷就日奉細書之一札但謹宣風比

者聖詔遐臨皇慈俯被曲承持節之召俾展執圭之儀
獲面威顏深諧志願豈謂遽頒恩制復委台司貳西臺
內史之崇升天官常伯之貴明敷有著峻舉徽章聽命
以還撫膺自失蓋念臣久叨重位過沐鴻私論報無階
踰涯既甚種種之髮復因病而得衰諄諄之心彌畏滿
而招損敢復昧進重增其尤豈可再以樗材玷于柄用
非止尸官充位瀆乃朝彛固當速戾傷年戕其生理實
貪生于盛世須瀝懇于露章伏望皇帝陛下垂諒愚駑

見矜惻款念隆器之無假寢茂渥于已行別擇良能寘諸丞弼如此則微臣保量力之訓庶道人言公朝得授方之規無傷國體傾祈至切戰悸無從

第二表

伏蒙聖慈以臣陳讓恩命特降批答不允者忤營之懇虔仰于至聰溫密之言曲形于優諭捧讀惶灼罔知所裁中讓竊以讓爵于朝前經之垂訓假人以器往聖之攸讓矧惟台宰之崇實居衡軸之地儻茲虛授曷允具瞻

如臣者識昧遠猷材惟常品獲邁亨嘉之會濫塵顯重
之資被眷兩朝承榮四近踐陰陽調燮之任莫代天工
贊夙夜宥密之謀無裨晝訪充位之譏攸集嚮明之願
彌敦乃至授鉞齋壇建牙戎翰厠星階之著象仍玷白
儀剖麟契以長人茂揚閭政洊易鑽榆之序載深存闕
之誠一節以趨猥承于君召介圭入覲方覲于帝暉豈
謂皇帝陛下靡間疎庸曲推圖任特頒揚庭之命再升
調鼎之司貳八柄于西臺冠六卿于會府洪惟真館欽

奉仙宗式峻使名用優寵數聆深辭之誨告撫疲質以
載懷神福于謙實害盈之可畏民惡其上且致寇以是
虞爰瀝丹心仰通尺奏未動穹昊之聽益增冰谷之憂
須更露于由衷冀必回于渙汗伏望皇帝陛下念僥榮
之太甚察量力之不遑申飭攸司亟停前詔庶使廟堂
重位免貽不稱之羞犬馬微軀更荷曲全之惠

代宋狀元謝及第表

宋宋庠及第在天聖二年宿印是榜進士

太常試藝謬參籍奏之榮法坐第名濫塞言揚之選沐

清光之下濟仰華旦之親逢祇荷寵靈伏增欣懼

中謝竊

以羣材博舉鴻化肇先慎簡乃僚紀歷代之寶訓譽髦
斯士垂大雅之美談克樹泰寧之基允為盛德之集若
乃右賢撫運左籥隆文率由上聖之姿規恢前帝之憲
伏惟皇太后淵猷冠古景鑠在躬軒曜儲靈有成湯之
骨法坤儀納順茂太姒之音徽鋪昭正始之風述宣中
壺之化而自鴻階紹建寶統嗣興授玉几之顧遺財成
樞務總金聲之條貫登翊聖真率循豐茂之規迄用緝

熙之典故得九清乃睠萬寶由庚諸福之物竝臻至治之隆胥洽靖共庶位招致羣庶舉師俊之彛章下發中之溫詔旌賁之命相望于巖中物色之求駢臻于闕下申飭辨材之制謹嚴飲墨之規輟邦直于中司簡朝英于上笏光昭盛節委重斯文如臣等涉獵有年削摩無狀士鄉充賦偶承乏于計偕英穀頑才固絕希于聖選撫空疎而增惕備程品以奚堪豈謂宸造曲成睿思狎至褐衣賜對扁帝宇之凝嚴睿藻躬臨竦天姿之溫穆

薦登茂級獲寘榮塗錫再命之身章曳屨有煥頌十行
之言絺雅興增華席鴻需以寢深委賤質而奚報臣等
敢不慎修履素惕奉紳書慕漢吏之惟良副堯心之在
宥恪居官次益敦宿業之方懷畏簡書彌勵夕冰之節
少酬覆露共誓捐糜

湖州到任表

空乏之才坐塵于冊府輕凡之質驟忝于列城郡望間
華朝恩光泰尸承在始隕越無從謝中伏念臣奮自孤生

略無異操偶階末技始籍中銓曾大以來門業不振平
素所望器分有涯叨于誤知會其乏使拔從凡品寘之
道山太平養棟之庭茂彥發礪之所名臣輩出卿幹森
呈而臣風識素淪藝文特謏納汙在上竊吹其中抱槩
十年無裨至治挈瓶一介有玷大猷頃從舟乘之還嘗
奉銓曹之領番休延閣之直趨走赤墀之塗亦在序之
通階有宿官之緒業非不知書筵暇豫臺職優崇相與
淵雲之徒樂道堯舜之事而臣母老垂白人意戀生不

勝懷土之情遂有祈天之奏乞從間郡自効薄軀展其
烏鳥之心慰彼寒泉之思伏蒙皇帝陛下賜恢仁覆推
廣孝心不違之顏煥生于咫尺曰俞之命驟需于穆清
輟七閩之遠藩授三吳之近地俯鄰州曲介在江湖風
土平調道塗夷近得以行過廬冢奉侍版輿人子至榮
紆蒙少輩君親大義論報末階臣已于今月二十三日
赴上訖初宣臺劄稍見城黎諭聖心在宥之仁視雅俗
如傷之意而茲土差沃去歲汔康比及春來頗有飢者

未到任前通判虞部員外郎劉璫奉若勤恤虔于救存
廣施振業之方幸無流亡之患今夏蠶既多縷麥亦有
秋諒開豐懋之占深洽熙平之化戴盆之下胥燭于天
光鑿井之餘同均于帝力而臣下車甫始去國迢遙孤
于外官不勤金革之習任以煩事又爽官臺之能獲守
偏方預班寬詔勉圖拙者之效庶逃候人之譏惟竭愚
衷以對靈施

蘇州到任表

江海腐生本惟一介東南守將併忝二藩循幸已多祇
榮惟懼竊念臣在器凡近于才樸疎起自後門奮從未
技清閒之始天穀賜收空乏之間書林見育幸預遊于
時雋得仰齒于朝闥行避蹊邪志希樹立終寡適時之
用曷殫當世之宜亦嘗出領倅車再懷守紱竭一心而
營職展四體以從公幸奉官箴不累刑史而門戶多難
年志早衰入麗正以校書忽踰五閤任奉常之博士凡
涉七霜去歲甫畢喪期僅存皮相間闕歸國黽勉服官

會收累稔之勞且旌羣吏之治太微郎位獲登一臺司會計官比更兩局有尸廩稍之入無裨泉賦之贏然而職業優游保無玷缺朝廷寬大足養資名清光在瞻榮塗可企但以亡親朽骨久滯攢塗微臣槁骸常憂先露幸中吳之闕守復故里之與鄰因瀝血誠仰干宸聽伏蒙皇帝陛下大恢仁憫深照丹愚濬發天慈下從人欲藩城之任既席厚恩臺觀之名尚塵前職違離都輦訪問路岐自淮以南雨水時若維夏之際蠶麥善收便道

過家去月至郡井絡繁庶土物清佳款太伯之遺祠高
風如在望闔閭之故里喬木猶存廨舍凝虛俸入優腴
茲獲寧于血屬前足治于親喪秋毫之微皆出帝力夕
冰之操彌厲臣心敢不肅奉詔書慎司刑典更徭之役
務恤下貧輿賦之期用勤公上勉圖薄效用答至恩

兩浙運使謝上表

祇荷詔除就承使乏用過本量恩越常均忖已無堪銘
襟增慙中謝竊念臣才能有限資名素輕直由腐生端遇

聖日因乃未技玷冒周行升預書筵無訂正之益進參
計局乏鈎校之勤絕補事經空尸廩稍加以不天遘閔
蚤歲喪親至使遺骸久在櫬壤常憂先露貽累後昆幸
蒙曲慈往俞更郡俯鄰州里之境通治閨門之私申錫
告文聽歸襄事前後十稔內外六喪取資圭田與祔真
宅釋犬馬之負頓覺累輕撫螻蟻之生未知死所況非
木石之偶豈膏丘山之恩方還本邦復布前誥寬大之
意一體上仁簡易之方仰遵治要庶奉三年之計或收

一日之長不圖大恩超使本道就頒臺札加賜庫錢光
照里閭色動車馬歷守二吳之地皆是藩城就宣一面
之風不離鄉部以布衣徒步之賤有畫繡前驅之榮寵
既至而忽驚感且極而興歎何則提封廣斥興賦繁并
持按察之權居澄清之任方于為郡之體不可同日而
言民隱難于究知官邪資于發摘游交聯絡于屬郡親
戚布滿于故鄉人倫則有義有恩正道則無偏無黨一
斷以法人且疾其少恩稍寬以私衆必譏其弛職已行

之命不可免至愚之資何以勝任重才疎功微賞泰此
蓋伏遇皇帝陛下天光均燭雲澤就施罔遺孤外之臣
謂可東南之使大君有命而見用雖出誤知小臣操心
之甚危敢忘圖報誓將灰隕以答寵靈

代趙漕謝轉運副使表

忽奉中俞備使外計人共駭其非據臣亦慙于罔功臣
猥以諛才濫膺煩使一持使節三易歲華以其承命之
勤委以救荒之政凡捐除租賦使無追呼之擾與振發

倉廩以消流亡之憂皆聖訓之所裁顧臣勞之安有方
自陳于疲薶庶少竊于安閒成命再加初心有愧況臣
孤根難植小器易殫自顧缺然無左右游談之助其誰
致此盡聖神特達之知恩大難酬感深以泣恭惟堯仁
宅下舜智察倫謂著在三尺之文莫非寬大故差擇百
城之寄要在廣平不維迂儒亦玷華選臣敢不祇承德
意遵奉詔條期在富民敢較米鹽之細謹于律下誓懷
冰檠之清

改左司郎中表

考課四期增秩二等寵光游集榮懼交懷謝竊念迹本
單平性惟介拙起于凡品之末邁此聖圖之亨猥用微
才遂叨非據內廷視草蓋出于誤知左掖握蘭亦緣于
虛授仍尸史局薰侍經帷久玷高華日重大官之費三
蒙宣召晚躋浴殿之深榮遇罕階忠誠自信上不欺于
仁聖內無愧于神靈然而才匪患多學惟寡要徒輒抽
于制命莫宣暢于神規以至審克刑章講修牧政皆上


資于聖斷徒謹守于詔文無所建明有慙曠素加以方
愚向國孤遠立朝本無左右之容不為朋黨之計貴游
可憚近習罕親常憂三至之言有惑四聰之聽方虞幽
黜敢冀寵遷宣謂記錄年勤推行恩典進左行之首秩
沛內史之榮章竊愧負乘益增隕越此蓋伏遇皇帝陛
下曲加金度深諒樸疎施及孤臣擢茲顯級敢不勉思
深訓飭厲薄躬務在守官不敢遺力期仰酬于覆露當
永誓于私捐

轉官乞回贈祖父母表

臣某言今月十二日閣門告報蒙恩授臣兵部員外郎
依前充職者超需崇恩越遷茂秩聳聞成命增悽幽衷
懷感之餘無言以寄中臣聞天以監觀而為德其聽孔
卑君以咸感而受人所愛惟溥矧至仁之御世務廣孝
以導民敢率丹愚仰干神睿難寢叫閭之欲預增惴谷
之憂竊念臣地緒本寒人資至劣謬操孤技端遇盛辰
獲躋仕階遙叨從蹕薄才緜力曾裨補之未施厚訓深

辭顧演裁之莫暢日襍禁林之被歲尸長府之錢豈圖
誤簡清衷旁稽陟典愍為郎之久次特升秩于七兵勞
則素愆恩惟加厚當即虔于制命然內迫于私誠臣曾
大以前不及進官歲時所祭未有名稱七祖臣某祖母
某氏越在幼蒙即承誨育早從厚窈常慨先慈而臣邁
會亨嘉尸承禁近盡事君之節即受教于樸忠推本祖
之言忍獨專于榮寵臣欲乞將聖恩欽授兩資官回贈
臣七祖七祖母一官一邑號庶伸愚志獲賁幽局伏望

皇帝陛下濬發天慈俯從人欲收曲恩于上閣漏麗澤
于重泉魂而有知應當淪骨臣雖不肖敢忘捐軀



文恭集卷九

欽定四庫全書

集部

文恭集卷十三

詳校官侍講臣王燕緒

檢討臣何思鈞覆勘

總校官原任中允臣王燕緒

校對官編修臣于鼎

謄錄監生臣牟焜

欽定四庫全書

文恭集卷十

表

宋 胡宿 撰

代中書樞密院陳乞御製明堂樂章表

近奉聖旨令臣等分撰明堂樂章者崇饗之初方修于
濶典登歌之首宜冠于彌文敢冒大猷不勝至願竊以
明堂謂之世室政教所班大饗寓于郊宮理則未正聖

惟善述道乃從隆伏惟皇帝陛下純輯羣元欽修百祀
馨香嘉粟以虔郊廟之思祇戒靜專以篤神明之接比
承天表之德大擁時邁之休然猶增秩無文益追來孝
企總章之嚴配卽太寢以薦誠稽參厥宜著定其當合
祛天地參侑祖宗迴臻變禮之方濬出淵衷之慮有司
得奉于隆旨若時絕企于清光而又度曲制名納言發
德親承沖旨爰命具臣俾牽軋于菲辭將登參于雅奏
內循疎拙曷足形容恭聆明詔之音一時增惕深惟盛

德之事千載罕逢至于賓延泰尊裒對元聖必資睿律
用播樂章乃可以交三靈之歡導百順之祉甘泉故事
開元舊儀咸著歌辭具存篆冊粵若章聖受元符之錫
祇答榮號時則徇弼臣之請親作法曲一十六章近則
陛下當景祐之隆聿修祀典居常因聽政之暇亦製雅
歌六十八章隸習奉常流傳樂府以承上下之祀用膺
穹厚之祥乃今五室旣嚴九筵是度人祇翹祀神替佇
音睿作有先工歌難曠其明堂大饗天地三位及祖宗

三位酌獻樂章欲乞聖慈特從御製用稽前憲俯照下
情暫授寶跗載摛睿藻薦功祖考揚德天人俾肅雍來
享錫之以難老與猗那長發摠之于無窮

代中書樞密院乞乾元節用樂第一表

今月二十七日入內都知王守忠等傳宣中書樞密院
爲魏國大長公主薨將來乾元節更不作樂者外館在
喪感深于聖性誕辰廢樂昭發于德音博稽降服之成
參酌祝筵之慶輒沿衆欲須冒主聰伏惟皇帝陛下錫

類贊戎寶慈立愛率堯仁而睦族諧舜孝以尊民敦叙
成風濟惠和于天屬慎徽流化格忠厚于人倫徇齊蓋
本于生知淳至匪由于外獎近者魏國大長公主虧和
感疾收視凝精診淵慮以焦勞形至誠而懇到候問旁
午襁褓駿奔特紆法駕之尊躬展家人之禮泣然流涕
親爲舐瞳極周文之小心無漢后之難色掩前王而特
出較至聖而孰能秦臺終迫于上賓沁水俄從于東逝
訃聞屢悼往臨盡哀五日廢朝頻卻大官之膳千秋邇

節豫停韶樂之音馳遣近璫諭宣冲旨尋禮官之獻議
原主黨之致哀已除功慘之喪得承吉祭之事既立文
之有素于用樂以無嫌况復華渚誕期綿區至慶相趨
萬玉之會大設九賓之朝重譯所通遠方皆至輯瑞之
藩侯陪覲執珍之夷使在廷稱薦萬年之觴宣覃一日
之澤薰颺待奏絳羽侍儀如停金石之音懼缺天人之
望形容盛德本資羽舞之蹈揚感召至和實賴鹿鳴之
宴樂伏望皇帝陛下勉遵彝典稍抑至懷收既往之盡

傷順無疆之祝頌濡然遷慮許一奏于咸英鏗爾發音
用參和于夷夏不勝至願實望曰俞

第二表

功服邁慘誕節卻音嘗貢奏函冀回冲旨比奉批章之
答未蒙從欲之俞聆命載兢仰高增跼伏惟皇帝陛下
孝思天挺睿德日躋履陶唐光被之資躬天乙懋昭之
美體慈為寶撫邦族以咸和立愛自親穆朝風而歸厚
近以齊國大長公主

案前表在未追封日此表在晦明
已追封後故魏國齊國異稱

生疾奄忽冥升棄集鳳之故臺邈來鸞于層宇陛下悼
深尊屬念積諸姑緬懷賢懿之風增重穆清之感亟傳
聖誨申敕具臣俯當甲觀之誕期趣罷宸軒之奏樂雖
天懷之嘉慕有越常均而邦典之孔明未違往制非止
正期之絕服已經外次之致哀比及宴辰累踰旬浹以
禮文而取正于樂事而得施自貴主之愆和比上賓之
復魄乘輿再駕冠蓋相望積齋旰之焦勞虔靈祇之請
禱理迷與善氣迫歸真淵衷足貫于神明至孝增光于

列辟況復誕彌之節實居朝慶之先臣工就望以揚休
夷夏駿奔而歸福安可以闕英莖之薦壽停金石之備
儀伏望皇帝陛下勉循至公少寬寧戚采容臺之上議
許樂府之奏音慰天人欣戴之誠副臣庶祝延之意惟
垂聞可以釋翹危

湖州乞爲太傅謝安置守家禁樵採表

春秋之記太上立德其次立功謂之不朽聖人之制能
禦大災能捍大患則必見祭至于封表閭墓禁止樵蘇

尋所來而綦繁蓋難得而疏舉雖聖賢相去事業有間
迹其大指所以褒德旌功而已竊見晉太傅謚文靖公
謝安挺生江表忠存王室甫從衡門未解韋帶已積台
弼之器便繫蒼黔之心及起東山相簡文帝摧桓溫九
五之逼破苻堅百萬之衆名蓋當世功濟諸華號文武
之偉人爲風流之稱首張文規所撰吳興錄稱安墓在
長城縣南六十五里初葬建康之梅山爲陳始興王叔
陵發其冢裔孫夷吾爲長城令徙于縣南三鴉岡按長

城即今長興縣臣昨受詔除出忝州任到官之日遂移
本縣訪墳柏所在據大理寺承知縣事裴大亮狀于縣
南萬安鄉三鴉岡訪得安冢履地十畝有畸古老相傳
謂之謝墓田路去縣與吳興錄所載略同墓傍社戶十
六歲時祭拜舊有叢祠不堪其陋臣量破公省錢委大
亮移置佳處重建祠堂凡屋十二遣工往塑其像冠服
儀衛悉用當時之制然祠墓差僻人迹罕至若無給復
之守恐罹樵牧之患昔信陵濁世之公子漢初蒙守冢

之給介推霸者之陪隸晉復啓環山之封况如安者高德卓然雖人隔本朝功訖前世穆然清風猶在庶物臣每見郊邱所肆赦前代忠烈立廟所在莫不申飭長吏嚴加虔奉欲乞聖慈特降敕旨于安冢旁申禁樵採給復五家以備灑掃守護之役敕州縣官吏歲時祠祭以明聖朝紀元功褒有德之意臣預頒詔書無補風化干冒冕旒臣無任祈天俟命激切屏營之至

代中書謝詔書止絕內降表

宸襟燭理明詔宣音杜邪枉之險蹊歸公平之正路欽承睿旨抃切愚衷

中謝竊

以王道之興必由正直國柄之

本實繫賞刑賞信則內外服焉治功日起罰中則羣下肅若姦慝不生屬在睿明張茲紀律伏惟皇帝陛下敷施治具總攬政綱有聖主廣被之資恢王者無私之度信賞必罰濟庶績之熙凝昭德塞違廣百官之臨照動修前憲率繇至公克守盈成遂底嘉靖然而承平浸久涵養益深偷薄之俗匪敦進躁之心易動紊公朝而幸

進趨私路以祈榮或蹈匪彝自罹常法規于貸免陰務
營求實繁內出之文深瀆至聰之聽廓然聖斷嫉此澆
風以謂制治之元大于一統蠹政之弊戒在多門因成
饗于合宮訖宣恩于層觀申坦明之定制塞流弊之濫
源或許自新庶幾且格實契澄清之理足消貪昧之風
臣等忝備近司親承隆旨雖無才見每誓樸忠敢不仰
稟訓言恪謹條約交相勗勵期在遵行

代中書樞密院謝瑞竹圖表

今月二十二日使至中書蒙恩賜臣瑞竹圖一軸者翠
本交枝駢生于禁園綰圖設色首降于叢霄啓鈿軸以
相鮮閱青玕之對聳圭衡兼映巾衍增榮祇賀恩頒彌
驚寵睠中謝伏惟皇帝陛下惠孚動植化洽平成朱草不
絕于史書行葦見歌于詩雅生物咸遂本資始于至仁
冲氣爲和乃薦榮于祥植瞻言平圃蔚產修篁擢豐壤
以同根出珍叢而異幹扶疎竝秀知造物之有功託寓
致靈表太平之無象慶昭縣瑞等駢柯有穆宸襟興

憐妙物降丹輿而留覽集華組以臨觀命繪事以傳模
敷德音而錫與臣等預瞻秀拔仍拜章施懽逢旦暮之
亨交勗歲寒之守永惟祕奉益切昭銘

代中書謝改官表

宗祀明堂
泛思改官

臣等言近進劄子以蒙恩改官乞寢成命伏奉今月十
三日手書所讓宜不允者思推異等事出常均比控丹
愚冀收華渚終祕允俞之旨復形敦諭之音閱琳札之
丁寧被絲言之郁穆敷誠莫克祇寵逾驚

中謝

竊念臣等

器非宏通才惟凡近起白士縫衣之賤遭不后席圖之
隆寢竊時榮遂階弼用處輔佐綱維之任當表率士臣
之先雖夙夜戴君勉竭自公之志而安危在相曷庸注
意之求固以聳曠素之深譏憂負乘之至咎幸遇亶聰
至治若古攷文復五室之肇禋廣六天而合祭纂戎率
義侑祖及宗齋戒有初已卻大官之妙饌登降攸恪復
虛小次之燕居故得精志通幽正陽升景重陰屏沴協
氣宣和三神鑒德以孚休四海述職而來助泛加恩澤

洽被庶工首從當軸之甄渙發揚廷之告參榮宰路進
秩升宮雖君命之當虔顧人言之可畏矧在具瞻之地
敢貪橫施之名懼校議之或興非家至而能曉嘗首陳
于底裏亦面叩于規中祈寢前思庶存小亮而螻蟻之
懇不能動天葵藿之誠徒知向日猥頒書詔中諭旨辭
謂汗令之已行彤袞袞而彌渥承命益增于隕越循牆
但極于凌競此蓋伏遇皇帝陛下樂在均釐醲于覃賞
思蓼蕭之澤及本芻狗之仁深超從進律之遷彌積在

梁之刺敢不欽祗休命永勛忠圖庶有答于曲慈或少
逃于清議

謝敕設表

伏蒙聖慈以臣入院賜敕設者視草充員方躋于坡禁
班觴示惠復啟于詔筵羅方丈之肴羞融膚寸之醪蟻
才林盛集橐從畢臻示恩禮之兼常被光榮而加腆此
蓋皇帝陛下嚮儒恢化稽古上文厚玉殿之詳延深複
門之睠遇賜收萬品召置禁局逮涓日以祗官復需雲

而覃渥大官先置宴豆有加闕鼇署之靚深增麟樓之
赫昬寵靈過泰徒醉飽于太平文采勿昭詎章施于盤
誥惟圖勤悴以答褒嘉

辭免翰林侍讀學士表

臣今月初二日閤門授到告敕二道蒙恩除臣翰林侍
讀學士者祇奉褒遷不任驚灼竊以參侍帷幄進讀典
文本優名儒兼采時望如臣者末學庸受一介野生無
他異能但逢聖獎謬加書命曷暢代言近以昏瞶乞補

閒郡嘗傾奏懇終寢俞音忽被曲慈擢升邇列學術淺
陋職位高華實匪至愚所可充選恍然承命森若負芒
伏乞聖慈歷簡耆明改授鴻碩庶安危抱以穆僉言

謝翰林侍讀學士表

冠居綸掖久玷清司參侍經帷驟羣大雅仰祇寵渙伏
積兢榮中謝竊以入奉便朝進敷往策膺穆清之顧問預

禁奧之趨翔無嚴徐之才不足承于應對有褚馬之學
乃可奉于諮詢如臣者性業顓蒙才資底滯記問爲學

曾莫究于言筌篆刻攻文絕無裨于治具端逢亨會漸
竊榮階歷右史之服官辱西臺之書命當彌文之盛際
獲忝代言之爾雅之深辭無施潤色久聳濫巾之誚居
懷襍被之虞幸遇皇帝陛下畱好藝文垂精道術觀邇
英之講勸廣衢室之訪臨延集諸儒究研羣典豈謂腐
生無狀上睿誤知升厠近嚴預陪進讀陳倚相邱墳之
典參張酺帷幄之臣職近地親材朽學陋將何以助稽
古道開益聖聰撫末學以空疎臨多文而眩懵徒尸禁

職莫稱厚恩伏遇皇帝陛下恢闡堯文循持禹律探觀
前史之載昭鑒是圖敷求承學之臣謬延遂及豈茲庸
淺足副東求惟當采摘善言鋪陳往行庶虔資于一覽
期祇慎于官箴

授侍讀學士舉官自代表

右臣蒙恩授侍讀學士準敕令舉官自代者臣伏覩尚
書兵部員外郎天章閣待制兼侍講趙師民學以爲已
善不近名道術通明德行純備有多聞直諒之益在正

始中和之流久侍講筵兼聯制閣儻甄升于禁職俾進
讀于祕書是能滋廣睿聰充副德選

謝宣召入院充學士表

臣某言今月六日翰林待詔費瓘至臣所居奉宣聖旨
召臣入院充學士者王人俯降天旨就頒召置承明之
廬解去邇英之籍寵褒驟至榮戀兼深謝中伏以渙號所

孚禁林爲重漢家待詔因金馬以名門唐世尚才自鑒
坡而移院官貴近而少輩地清祕而罕階深惟視草之

難宜得燃萁之敏豈伊蕞陋足玷禁嚴竊念臣材拙且疎器凡而近出自羈單之緒遘于熙盛之辰進忝士科預尸東觀守待再假漕節一持孤于外宮介在東鄙分當文俗之使絕希翰墨之游出而誤知矜其久次沛然降劄召言還臺辱右史之珥彤玷西垣之書詔進禪治體無爾雅之訓辭坐冒職儀乏相賓之名實乃尸朝委兼攝中銓僅遵唱注之規蔑著品題之目遽從綸省入侍經帷陪諸儒之竝游預羣書之進讀欣屬好文之會

舉迷摘句之方訖無忠言裨于上聽方虞襍被之汰遽
承出綽之遷召拜北門延升近署申加通職參莅史闡
兼二官之至榮盡一時之清選瑣材極陋寵數踰涯此
蓋伏遇皇帝陛下假借用人曲成遂物誤采頑愚之質
知無左右之容以其嘗踐掖垣經爲明命亶無他技麤
有前勞擢于禁奧之司復責演裁之效矧上清之冊府
侔方丈之仙山將何以寓直禁中備穆清之訪對誕敷
天下約雅奧之代言始承命以若驚終捫心而失措惟

當服勤緒業率厲愚衷恪遵四禁之規祇守十思之慎
用殫志力以誓粉捐

舉呂溱王洙自代表

臣蒙恩除翰林學士準敕舉自代者臣伏覩起居舍人
知制誥知杭州呂溱蔚登首舉綽負宏文尚書工部郎
中知制誥充史館修撰兼侍講王洙號稱俊儒通明經
術嚮聯詞掖同掌命書灼見猷爲雅欽才望願停茲命
回授若人則公議有在時談允穆謹具狀奏舉自代以

聞

代中書謝爲伏日早歸第表

伏日歸休雖存于告令中曦趣下蓋軫于慈襟祇荷寬
優交增榮悚

謝中

伏惟皇帝陛下紹隆炎厯凝監太清茂

遂萬物之宜變成四氣之順因天地長贏之盛化洽乘
離屬金火伏藏之初仁深扇暘降王人于禁奧傳天語
之溫淳閔以服勞許之夙退獲遂燕申之適彌昭曠素
之慚

代中書樞密院謝譯經院賜御筵表

節近繞樞方翻文于竺館仁深推食俄示惠于詔筵聿

荷需恩彌慙曲寵

謝中

伏惟皇帝陛下研幾衆妙繹志大

猷本上聖之多能繇中天而稱號混并書軌崇護宗乘

重九譯之語言旁開梵學正五天之文字祖述聲源講

誕節之祝延奉祕經而演潤揚妙音而伊始資睿算以

無疆臣等迹玷近司才疎了義臨真筵而曷暢對豐豆

以攸慚

代中書樞密院傳法院罷堂賜宴表

三館翻文慶猗蘭之紀節句筵參義譯貝葉以成篇介
上聖之元祺續大雄之慧命雖獻如山之祝未登程石
之觀梵夾修書愧棲毫之乏潤臚傳敞宴驚兼豆之逾
豐臣等匪究真筌空塵譯綴徒尸承于飫賜彌隕越于
愚衷

代中書樞密院謝題明堂御書後書名表

伏奉聖旨許臣等所請于御書明堂之門額後各書其

名者千齡罕值二寶親逢復得請于曰俞獲附名于不朽榮兼常等感集幽衷謝中伏惟皇帝陛下炳發彌文紹修宗祀合天神而右饗即祕寢以告虔泛灑百金之毫出于聖思冠絕六師之體表厥雲夢迴極奇蹤實昭能事允爲歷代之寶式嚴清廟之藏臣等修輔之能邁辰爲幸猥承沖旨獲署珍圖仰欽至聖之眷懷益慶具臣之遭會相期勗勵圖報睿明

代中書樞密院謝賜御篆明堂飛白明堂之門表

義畫垂文奎鉤賁采降王人而頒副窺神迹以究奇仰

服異恩同懽榮遇

謝中

伏惟皇帝陛下聰文攸縱神睿多

能嚮屬九房攷制五室並侑祖宗之靈大合郊邱之祀
紹興能事濬發精衷聖藻裁篇首發歌于寶鼎宸毫結
字復清墨于金壺揭華榜以相高參飛薨而並麗選工
禁署寓刻祕珉肖鸞龍翔翥之形盡金石昭銘之美恩
頒位宁榮及圭衡臣等並邁千齡獲承二寶慙無裨于
台宰誓永屬於昆雲

代謝御筵詩表

靈畢疏恩方啓示慈之宴寶跼叩寂忽傳正始之音竦
禹律之鏗純布堯章之魏煥百拜同歡于幸會諸生絕
企于清光靈寵便蕃營魂隕越謝中伏惟皇帝陛下紹休

丕緒總攬懿綱聖能之才蓋本于天縱光明之學不待
于月將昭大德以建中酌彌文而稽古鶴書赴隴樂得
穀中之英鳳宸臨軒親詳天下之士霈隆恩而普洎豁
大度以兼收爰仰晞露之燕胥載錫起風之宸唱訓辭

深厚式玉度以彌堅審制坦明倬雲漢而並麗莫究入
神之妙益知游聖之難臣等猥以頑疎邁茲全盛鈞天
之樂九奏已獲聽聞春山之寶萬金更容緘祕敢不述
宣聖憲祇奉洋謨銘在盤盂用謹勅天之命勒于金石
永昭茂世之規

文恭集卷十

欽定四庫全書

文恭集卷十一

宋 胡宿 撰

表

代中書樞密院謝賜三朝寶字訓鑒圖表

天光燭臨王人降蒞神毫映發繪事照陳獲凡目之榮
瞻增愚衷之慶忭中謝恭以國家自一戎之變伐經五代
之荒屯文匿采而弗昭武淫威而未戢太祖皇帝削平

多壘式遏橫流中區始混于車書生民得去于湯火太宗皇帝纂戎以睿右治在文躋俗中和之隆同風魏煥之盛真宗皇帝靜淵疊穆緝熙光明協于二后之華粹乃一王之體厥初締構以屬盛盈聖算成功彌文盛德洋洋盡美蕩蕩難名至于裁決繁機奮耀英斷署鳳毛之尾摘犀管之英莫不墨寶相輝神鋒迴拔居然鸞鶴之翥蔚有龍虎之威祖宗多能固天之攸縱聖明善述歷世而彌光伏惟皇帝陛下道德昭前聰明時憲規恢

祖服務廣先猷攷合神書搜羅遺藁奇蹤畢獲顯跡概
揚留聖思于勒成命侍臣而類次形于方版之鏤參諸
設色之明序以宸章置之禁坐蓋將訂盤盂之作况几
杖之銘式遵燕翼之謀用慎起居之戒茲惟不朽之事
以永無疆之休臣叨預宰聯親逢盛際禁嚴趨召已覲
寶跼之文祕副辱頒有踰拱壁之賜誓榮藏于衡華永
傳奉于昆雲

代中書樞密院謝許御製樂章表

近上表陳乞御製天地祖宗樂章事伏奉批詔所乞宜
允者上睿作歌冒適于章請至聰垂聽申答于詔音恭
聆曰俞相趨載躍中謝伏惟皇帝陛下紹休基緒獨運陶

甄修閣典而勃興奉先猷而善述恢張治具皇建極于
大中總緝禮文邈同風于魏煥多能攸縱衆志必通天
翰載飛妙龍鸞之翔翥宸章有作麗河漢之昭回鑽仰
難名範圍莫大屬講儀于宗祀方詠德于我將尚秘淵
懷且諭沖旨敕邇臣而咸述哀衆議而匪安以謂紀綱

四聲必資于睿律章施萬物當賴于慶雲因露需頭之
封竊祈元首之作昭明盛德冠映衆篇太陽回光不遺
于微藹秋風發詠許挹于秀蘭告成祖宗對越穹厚韶
盡美矣行覩于來儀禹無間然允彰于致孝天人胥慶
策牘相輝臣等竊邁亨嘉無施贊補獲奉批章之答併
增度曲之榮

中書乞賜御製表

西清繹志東壁垂文幸諧物覩之榮竊冀恩頒之寵輒

茲披露倍極震惶

謝中

伏惟皇帝陛下駿惠在躬亶明宣

業總郁彬而成化宅淵靜以凝神堯德始于欽明被于
四表湯聖由乎修紀正厥萬邦克念惟勤允恭若厲洪
惟元嗣夙茂英徽上庠之典式觀載崇術教內豎之詢
弗置攸踵溫文且復厯探前世之規躬抒有章之作聿
申慈訓益懋凝猷而又儲思鑾鑾之中研幾繫象之表
索至精之理智同于萬殊宣尚要之辭體包于三變金
聲迭振緹帙相輝與經義以備陳居爲代寶兼天常而

廣布用厚民風而臣等備位黃樞侍觀綈几珠躔逖仰
慚測管以非周瓊蘊悉披慶出圖之期偶竊懷聳扞彌
激傾虔恭祈容照之私庶適傳家之願其前御製伏望
聖慈各賜一本所冀洗心祇誦以獲于漱芳清室謹藏
永期于承式

中書謝宣赴清景殿觀御書賜宴表

紫闥沖深綈囊充積寶元儲之善訓許下士以恭窺久
奉宣游游蒙示惠仰懷殊遇內積至榮

中謝伏惟皇帝陞

下疊穆御邦哲明稽古蘊多能而乃聖臻大定以無爲
承孚佑之祥奉之虔輩集累仁之慶俾厥熾昌爰崇建
于東闈用固安于大本若乃孝恭天賦敏惠日躋自稟
夙成非由外獎而陛下深敦慈勗茂闡良規攷述作之
大方垂睿明之諄誨復以章天之御藻藏府之前編聿
昭齒學之風並示賜書之寵載形中旨悉念邇臣趨祕
禁之凝嚴侍威顏之咫尺瞻壁日重輪之曜慶偶亨辰
踐玉山四徹之塗鋪觀典宸辭綺煥仙翰雲飛若龜

負以攸傳豈管窺之能測足使上庠崇術更廣于多聞
步障題篇遠慙于懿戒矧惟邃宇邈處層霄飛闥連延
華題照灼山擬蓬而轉遶池象壁以縈流杳絕世氛曩
倂真境乃閒宴凝神之地蓋齋居味道之庭羣帝下觀
百靈潛護居然物外理絕階升猥沐詳延仍容泛覽塵
眸乍刮俗骨疑輕恍若夢于鈞天飄如乘于飈駕而又
沛風發唱堯酒分甘徵繼屬于良康浹懽愉于酣滑鍾
千齡之契遇極三接之便蕃臣等謬忝近司無裨至治

金匱要略卷十一
荷顧存之尤異申答效以何階

謝賜衣服鞞轡馬表

伏蒙聖慈以臣授前件職蒙恩賜臣衣一襲金腰帶一條金鈹銀鞞轡馬一匹者祇荷寵榮伏增悚覲竊以輿馬之錫用以飾恩服物之章茲焉旌禮睠言近侍抑著通規惟華光拜職之初均禁林加惠之厚衣頒御府馬出王閑耀韉轡陸離之光被帶環精麗之飾豈屬思文之后稽若前猷寵綏承學之臣昭茲異數自匪博通之

選曷膺渥異之恩如臣者謬以瑣才尸于禁掖莅事積
惟煩之誚不學有將落之譏實無補于演裁俄有叨于
進讀已玷近嚴之職仍兼賚予之榮乏鄒彥明經之能
慚漢臣稽古之力徒成妄施冒報曲慈

又謝賜衣服鞶轡馬表

複門天近遂獲兼榮二閣神深更容再至仍拜便蕃之
賜益深俯偃之懷竊以車服之章以旌稽古名器之分
戒在假人自非閎博之流莫膺蕃庶之錫如臣者性未

入道學不經師語人地則遠孤論才質而空劣撫草茅
之蕞質偶值時來參筆橐之禁聯豈繇德舉已叨官于
玉署復增職于金華仍稽加惠之文且厚敷經之眷延
英開閣御府賜衣上駟之馬旣閑載華韉飾褰蹕之金
有赫增耀帶環顧疵賤以奚堪在寵靈而過泰曳婁弗
稱彼已爲慚誓捐一介之軀以答九乾之施

謝兼侍讀學士表

命出曲慈恩加舊物邇英之籍絕而復通禁林之聯榮

而兼綰省躬非據承寵若驚

中謝竊

以訪道觀書聖人之

高致執經摘句儒者之難才自非直諒多聞宏通精識

疇膺顧問參備侍宸如臣者性質樸疎器能隘薄起一

介之白士逢千載之亨期粵自脫巾寢叨非服遙從右

史亟踐西臺蒙甄書詔之勞嘗忝敷經之列才不足以

宣暢明命學不足以開益睿明甫參西序之榮驟被北

門之召一去金華之業寢廢研覃久汙玉堂之居更慚

空素固常襍被忽奉如綸再陪大雅之羣重侍使朝之

讀自惟庸淺曷奉討論職思其憂心焉如灼此蓋伏遇
皇帝陛下特回簡照收採方愚許入廁于衆賢伴嗣修
于前職欽惟將聖稟自亶聰羣下莫企于清光分寸曷
裨于淵智敢不申尋緒業溫繹舊聞用磨衰鈍之姿少
答高明之選

乞贈李昭述官賻卹其家表

臣等伏以甄德表行紀功恤逝聖王之仁政也竊見故
翰林侍讀學士尚書右丞李昭述德範純深夙性耆俊

行修而才敏氣沖而節和然以賢公之孫名臣之子奕
世濟美弱冠立朝臺閣典章多所該識中外事任莫不
厭服竭盡近職晚侍經幃志慮益恭年力克壯近緣齋
禁嬰疾臥廬遄蒙告恩許還私第寢以縣劇遂至隕喪
臣竝叨講讀同籍祕嚴常僚之情實憎楚愴愍章之飾
輒有控訴伏望聖慈許依近例優贈昭述一官賻卹其
家魂而有知死必無恨誓將結草陰報漏泉臣等無任
祈天俟命之至

辭免端明殿學士翰林學士兼侍讀表

臣今準問門告報降到告敕各一道蒙恩授臣兼端明殿學士依舊翰林學士知制誥兼翰林侍讀學士者恩雖持出事本彙征降命自天處躬無地敢叨妄施須叩至聰竊念臣器質隘疎天資樸訥以一介之固陋值千載之休明起自腐生羣于大雅寢叨非服盡出曲慈待對承明之廬進讀邇英之間徒循持于章句莫開廣于聰明文翰之司一登于方丈禁嚴之地四對于浴堂每

惟介拙之才久闕翹英之路未能引退敢復僥榮豈謂
謬恩申加近職况寵靈之過泰豈名實之相賓若冒榮
章彌速公議伏望皇帝陛下濬開俞旨追寢命書俾爰
極陋之姿得安至當之分免詒謗累更益過尤惟竭孤
忠以酬鴻造

謝兼端明殿學士表

祗膺寵渥伏積兢惶竊念臣性本方愚才非秀特早遇
洽平之治猥塵禁近之司繼忝崇恩益升秘職荷榮名

之華疊愧庸品之孱虛此蓋伏遇皇帝陛下敘進羣才甄揚衆職遂俾至愚之質亦叨加惠之恩惟當竭頑庶幾圖報

謝授左諫議大夫充樞密副使表

伏奉聖恩授臣左諫議大夫充樞密副使蒙降批答不允仍斷來章者丹赤露中願收于妄施穆清在上終秘于俞音承命難逃省躬愈慙謝中竊念臣性慚機警識匪該通以斷斷之鯁生遘巍巍之至治謬踐仕版寢竊書

林器無可養之姿材非致遠之具太平樂育廣施成造之恩英俊並遊最處遠孤之目以膚受之學兼體弱之文擢在絲庭召置坡禁參邇英之進讀濫端殿之兼華盡出誤知繼而非服僥榮尸職重遇邱山論功計勞訖無毛髮方懼必行之黜敢冀非常之恩忽被命書俾陪宥席聞詔而循牆以走撫躬而喘谷如臨矧茲斗樞實本兵柄上贊幄中之畫密籌徼外之情必也敏謀與夫碩望乃堪聖選始允師言今則弗然屬之不肖遽陳危

懇仰叩至聰冀寢謬恩別咨時傑控祈雖切批諭莫從
但俯偃以滋恭懼負乘之致寇此蓋伏遇皇帝陛下至
仁博愛大度兼容察其方愚亮茲狷直知中立之寡黨
憐左右之無容出自聖心委之機任退省孤臣之分何
勝明主之知惟當勗勵忠圖期殫愚筦若虞機括當戒
于纖微不出戶庭更遵于慎密庶將盡瘁圖報曲成

謝傳宣入伏早出表

景炎朱火氣匿庚金伏日早歸雖聞著于漢令中曦促

下乃特軫于堯仁忽降使璫俯傳天語荷承恩之下暨

欽渥旨之曲全

謝中

伏惟皇帝陛下若古凝猷對時孚化

愛溥將之靈命躬博愛之至仁眷乃近司釐茲庶務當

炎帝承離之盛矜此服勞推夏王扇暍之慈

業扇暍據淮南子是

周武王事此殆因借對炎帝故云夏王

俾爰風退去公門之煩溥獲私室

之燕申臣等謬以庸虛叨斯密勿竊樂舒長之化彌欽

寬大之私

謝羊酒表

臣某言伏蒙聖慈以臣生日特降詔書賜臣羊酒米麪

者王人傳詔天語宣恩捧戴有初兢惶無措

中謝

竊念臣

出于單緒起自孤生曾乏異才本絲白望寢竊禁嚴之

職適叨內密之司半策靡施寸長莫效徒尸稍食重費

殮錢加以享大官之珍甘叨內府之賚予夕冰之懼每

積于愚心秋毫之微莫非于帝力負乘爲愧幽黜是虞

豈圖當宸之尊特記設弧之旦餽牽加賜醪酒俯霑申

以粢粢光于圭臬此蓋伏遇皇帝陛下睿慈曲施宸照

周融未捐曠素之臣特舉匪頒之典誓當殞瘁以答寵
嘉

又

伏蒙聖慈以臣生日特降詔書賜臣羊酒米麪者使驛
馳臨詔綈俯降辱彝儀之豐腆加旅物之便蕃拜賜爲
榮省躬知幸

中謝

伏念臣腐生少賤曲士至愚端遇重華

之辰進竊內樞之任智謀淺昧曷陪坐幄之籌廩稍優
豐益取伐檀之刺惟名器之踰分虞負乘之致災式是

仲商屬茲誕日設弧感往列鼎念親永惟罔極之恩重
愧無庸之質豈謂伏蒙皇帝陛下慎隆國體加惠近司
醴酒餼羊籩麴豆米併爲異數賚及私庭等乾坤之施
愧無以報戴高衡之賜懼不能勝惟堅忠藎之誠少答
睿明之施

乞解罷樞密院表

臣某言近以年力衰疲目瞳昏乏乞還機政嘗貢表函
勿奉詔批未俞章請常言加飾聖度兼容葵藿寸心徒

知向日螻蟻微志未能動天有迫愚誠難祇沖眷竊念
臣本惟空劣特出單寒自縫掖之諸生參持橐之近侍
章句末學不足以名家篆刻小文何施于治世徒以樸
疎受性孤遠立朝恥朋比之事君愧浮沉之遂俗介然
自信軋者固多誤緣仁廟之知屢奉浴堂之對拔于詞
禁置在機庭未嘗伸幄中之籌不及更聞外之任豈能
坐制千里通知四夷幸賴安平偶容曠素伏惟皇帝陞
下入纂聖統肇嗣寶圖優假舊臣寅恭初政臣每因奏

事親奉德音患太平含養之深懲流弊因循之久垂訪
一時之策規恢萬世之模盛德難名清光絕企而臣少
壯之齒已不如人衰繭之年豈能圖國以至聖之主責
甚愚之臣夕惕爲憂任重且殆仍以犬馬齒戴鐘漏景
侵因陳昧死之章冀丐餘生之逸得從謝事姑遂養疴
而璇指未回玉音尚秘彌荷包荒之德益昭圖舊之仁
然而知止足者道家之至言潔去就者儒生之常分久
貪曲寵終速多言伏望皇帝陛下哀矜陋軀保全孤節

俯從私欲俾退仕途別選耆英用參機劇則進退臣節
得休息于筋骸而本末主恩更薰酣于骨髓

笏記

代中書樞密院謝賜飲福大宴笏記

三神歆鬯甫畢于嚴禋百福在壺式均于愷宴敷宸恩
而載洽慶亨會之斯逢伏惟皇帝陛下乘榮居尊宅中
建號直房心之華覆即太紫之秘庭擬制合宮崇饗上
帝三后纂戎而竝侑百神啜食以在旁聖志幽通靈眈

來答旣成祀而昭孝復式燕以示慈縱魚龍曼衍之觀
陳金匏囂庶之樂籩羞菜列觴醕旨清在上之威顏弗
違同伸就望助祭之臣工咸在莫不懽康但醉飽于太
平益謳吟于睿聖臣等叨膺宸眷謬備宰司獲上萬年
之觴不勝千載之幸徒尸飫賜莫補大猷

謝兼侍讀笏記

祇膺華寵伏積驚惶竊念臣篆刻文膚受爲學居自
慚于曲士進不至于醇儒幸遘盛辰偶緣末技淺升華

近稔服禁嚴預裁內史之書復視北門之草常虞弛職
敢覬謬恩忽參進讀之聯彌積兼榮之愧此蓋伏遇皇
帝陛下早矜介拙曲賜甄陞惟圖竭盡之誠以答優殊
之眷

中書樞密院謝春宴筵記

臣某等言乘執規之春令爰舉舊章示折俎之天慈式
陳廣宴展湛斯之晞澤慶樂只之逢辰伏惟皇帝陛下
順斗頒常對時覃惠凝睿思于黃屋惟以靖民均凱樂

于春臺未嘗在已屬政機之暇豫因節物之韶妍稽象
于需修懽在鎬以謂人神之心洽則天地之氣和大會
雲龍之庭高張金石之樂融天壺之御醴溥洽羣臣回
日角之睟容俯暉暉萬物恩旣孚于上下禮亦協于沖和
臣等忝列近司欣階幸會邇清光而尤密戴至造以何
勝

秋宴筵記

嘉觴備物正得秋而萬寶成法宸垂衣居其所而衆星

拱粲然盛觀生于太平此蓋伏遇皇帝陛下鴻慈自天
湛恩濟世洽茲德禮燕及臣工臣等備位何能蒙澤已
渥願介萬年之景福共傾三祝于華封

代中書謝秋宴笏記

西成協歷慶歲物之順蕃廣宴班觴示宸慈之昭錫爰
修鎬飲允洽需恩伏惟皇帝陛下化穆中區仁孚羣品
設衢樽而勵物厚鼎飪以需賢俗阜刑清號網魚之云
漏氣調時豫聆銅雀之載鳴華黍由庚景風通正誘淵

衷而載懌宣愷澤以咸周金石具陳纓綈竝集妙伎高
尋于撞木清歌上過于雲門瞻黼幄之宸暉已慚形穢
聞霓裳之法曲更覺魂驚同歌既醉之篇欣邁寢昌之
運臣等忝司樞席叨侍詔筵愧無云補之能但積屬厭
之辱

文恭集卷十一